



ATASSUT
Postboks 399
3900 Nuuk
+299323366
Fax: +299325840
Atassut@greenet.gl
www.atassut.gl

Nuuk 8. oktober 2007

Inatsisartut suleriaasianni § 36, immikkoortoq 1 naapertorlugu matumuuna imaattumik Naalakkersuisunut apeqquteqarpugut:

Apeqqut: Aningaasanoorajunnerup annikillisarneqarnissaa siunertaralugu Naalakkersuisut sunik suliniuteqarpat?

(ATASSUT sinnerlugu Inatsisartuni ilaasortaq: Emilie Olsen)

Tunnqavilersuut:

Aningaasanoortarneq aningaasanoormullu ileqqut pillugit misissuisitsisoqarnerani februar 2006-mi Paarisamit saqqummiunneqartumi, nalunaarutigineqarpoq aningaasanoortarneq aningaasanoormullu ileqqut isumaginninnikkut ajornartorsiutinik pilersitsisarsinnaasut, tamatumalu kingunerisaanik meeqqanik paarsinerlunnerit aammalu akiliisinnaassutsip annikillineranik kinguneqarsinnaasarlutik.

Misissuinermi ersersinneqarpoq nuna tamakkerlugu inuit 650-init ikinnerunngitsut nassuerutigisimagaat aningaasanoortarnermik ajornartorsiuteqartuullutik. Tamatumalu saniatigut inuit amerlasuut aningaasanoortarnermik ajornartorsiuteqarsoralutik nassuersimapput.

Inatsisartut 2006-mi ukiakkut ataatsimiinneranni ATASSUT-mit siunnersuutigigaluarparput aningaasanut inatsimmi 2007-moortumi aningaasat 2.5 mio. kr. aningaasanoorajuttunut katsorsaanissamut atugassanngorlugit illuartinneqassasut aammalu aningaasat taakku ilaat atorneqassasut aningaasanoorajunnerup kingunerisai pillugit paasisitsiniaanissamut, ajoraluartumilli siunnersuuterput ikinnerussuteqaatigaarput.

Naak massa siunnersuuterput akuersarneqanngikkaluartoq ATASSUT-mit maluginiarparput isumalluarfigalugulu Naalakkersuisut akissuteqaamminni neriorsuuteqartut ukioq 2007-ip ingerlanerani aningaasanoorajunnerup akiorneqarnissaa taamatuttaaq katsorsarneqarssinnaaneq siunertaralugit paasisitsiniaasoqassasoq.

Paasisitsiniaasoqarnissaanik pilersaarusiortoqarneraraluartoq, ajornartorsiutillu anigorniarneqarnissaanut pinaveersaartitsinermik suliaqarnissamik pilersaaruteqartoqaraluartoq, ATASSUT sinnerlugu Inatsisartuni ilaasortaasugut angalaartarnitsinni paasivarput, aningaasanoortarneq aningaasanoorajuttuunerlu sinerissami illoqarfinni nunaqarfinnilu suli annertuumik ajornartorsiutaasoq.

ATASSUT-mit isumaalunnartoqartipparput nalornisigalugulu iliuutsit massakkut ingerlanneqartut naammannersut, taamaammatt apeqqutit makku Naalakkersuisunit akineqarnissaat kissaatigivarput:

- Naalakkersuisut qinnuigineqarput aningaasanoorajuttuunerup anigorneqarnissaanut iliuutsit sor-piaat ingerlanneqarnersut.
- Suna pissutaava Inatsisartut 2008-mut aningaasanut inatsisissaattut siunnersuummi immikkut iliuseqarnissamut illuartsitsiniartoqarsimannginneranut, naak massa ilisimaneqaraluartoq inuit 650-init amerlanerusut aningaasanoorajunnermik ajornartorsiuteqarlutik nassuersimagaluartut?
- Aningaasanoorajunnerup pinaveersaartinneqarnissaanut iliuseqannginnerup iluaqutissartai suut Naalakkersuisut matumani tikkuarsinnaavaat?
- Sooq aningaasanoorajunneq inuunerinnerulernissamik suliniuteqarnermut immikkut iliuseqarfigineqartussatut saqqumilaartinneqanngila?
- Konto pingaarneq 32.10.08-mi aningaasanoorajunnermut katsorsarneqarsinnaanermut periarfissat sooq immikkut oqaasertaliussani ilaatinneqanngillat?
- 2006-mi aningaasanoorajunnermik ajornartorsiutillit qassit Qaqiffimmi katsorsarneqarpat ukiorlu manna 2007-mi manna tikillugu qassit katsorsarneqareersimalereerpat?
- Inuit tamat ornissinnaasaanni, bingortarfinni aammalu aningaasanik ikisilluni immeraattarfinni assigisaannilu, paasissutissanik aningaasanoorajunnermit katsorsarneqarsinnaanermik periarfissanik erseqqissaataasunik taamatuttaaq aningaasanoorajunnerup isumaginninnikkullu ajornartorsiuteqarnerup ataqatigiissinnaaneri pillugit nivinngaassuisitsisoqarnissaanik Naalakkersuisut pilersaaruteqarpat?
- ATASSUT-mit siunnersuutigisimasatta suliarneqarneranut atatillugu aningaasanoorajunnerup ajornartorsiutaaneranik taamaammallu iliuseqarfigineqartariaqarneranik Naalakkersuisut isumaqataanerarnertik suli attappaat? Suli Naalakkersuisut isumaqataasimassagunik iliussissat tigussaasut suut matumani takorloorneqarpat?

Piaartumik akineqarnissara naatsorsuutigaara, akissutillu ukununnga nassiunneqassasut kissaati-gaarput: aus@gh.gl krje@gh.gl thok@gh.gl gora@gh.gl ekri@gh.gl kiisalu landstinget@gh.gl

Qujanaq.